



Bosnia and Herzegovina
Federation of Bosnia and Herzegovina
CANTON SARAJEVO
Ministry of Economy

Broj: 07-05-15-34096-2/24
Sarajevo, 04.07.2024. godine

Na osnovu člana 4. stav (1) Pravilnika o postupcima u provođenju programa razvoja male privrede ("Službene novine Kantona Sarajevo", br. 20/21, 25/23, 47/23 i 16/24), a u skladu sa Odlukom o usvajanju Godišnjeg plana provođenja Programa razvoja male privrede za 2024. godinu ("Službene novine Kantona Sarajevo", br. 19/24 i 22/24), Ministarstvo privrede Kantona Sarajevo objavljuje

JAVNI POZIV

za dostavljanje prijave po programu: "Poticaj direktnih stranih ulaganja - Podrška za osnivanje pravnog lica čiji je osnivač strani ulagač"

I PREDMET POZIVA

Predmet Javnog poziva je dodjela finansijske podrške za osnivanje pravnog lica - društva sa ograničenom odgovornošću sa sjedištem u Kantonu Sarajevo (u daljnjem tekstu: KS), koje ispunjava uslove za svrstavanje u kategoriju subjekta male privrede prema definiciji subjekata male privrede iz ovog Poglavlja, odnosno prema definiciji subjekata male privrede iz Zakona o poticaju razvoja male privrede ("Službene novine Kantona Sarajevo", broj 29/15) (u daljnjem tekstu: Zakon), a čiji je osnivač strano pravno lice koje nema registrovano poslovanje u Bosni i Hercegovini (u daljnjem tekstu: BiH), odnosno strani ulagač.

Definicija subjekata male privrede

Malu privredu čine subjekti male privrede, fizička i pravna lica, koja trajno obavljaju zakonom dozvoljene djelatnosti radi ostvarivanja dohotka odnosno dobiti, uključujući samozapošljavanje i porodične poslove povezane s obrtom i drugim djelatnostima, registrovani kod nadležnog organa, bez obzira na oblik organizovanja i koji:

- su samostalni u poslovanju,
- zapošljavaju prosječno godišnje manje od 250 lica i
- ostvaruju godišnji prihod manji od 97.500.000,00 konvertibilnih maraka i/ili čiji je bilans stanja manji od 84.000.000,00 konvertibilnih maraka.

Samostalnost u poslovanju postoji:

- ako druga fizička ili pravna lica koja ne ispunjavaju uslove za svrstavanje u kategoriju subjekata male privrede pojedinačno ili zajednički, nisu vlasnici kapitala ili ne učestvuju u pravu odlučivanja više od 25% u subjektu male privrede,
- ako je prekoračen udio od 25%, ukoliko udio u vlasništvu ili u pravu odlučivanja u subjektu male privrede ima investicioni fond ili javni sektor, pod uslovom da njihov udio u kapitalu ili u pravu odlučivanja pojedinačno ili zajednički nije veći od 50% i
- ako raspored udjela u vlasništvu subjekta male privrede nije moguće utvrditi te se, na osnovu posebne izjave istog, može opravdano pretpostaviti da druga fizička ili pravna lica iz tačaka a) i b) ove definicije samostalnosti u poslovanju, ne prelaze ograničenja uslova samostalnosti u poslovanju subjekata male privrede iz tačke a) i b) ove definicije.



II PRAVO UČEŠĆA

Pravo na učešće u postupku dodjele poticajnih sredstava po ovom Javnom pozivu ima strano pravno lice koje nema registrovano poslovanje u BiH - strani ulagač, koji podnese prijavu na ovaj Javni poziv i:

- 1) ako posluje minimalno dvije godine do dana 31.12.2023. godine,
- 2) ako u finansijskim izvještajima za 2022. i 2023. godinu ima prikazanu dobit,
- 3) ako ispunjava uslove za svrstavanje u kategoriju subjekata male privrede prema definiciji subjekata male privrede iz Poglavlja I ovog Javnog poziva, odnosno prema definiciji subjekata male privrede iz Zakona,
- 4) ako ima kvalitetnu poslovnu ideju koja je kroz proces cjelovitog planiranja razvijena u perspektivan poslovni model predočen u formi biznis plana,
- 5) ako je izradio biznis plan koji obavezno uključuje ukupna sredstva za realizaciju ovog biznis plana, kao i obezbijedena sopstvena sredstva i/ili kreditna sredstva i poticajna grant sredstva za realizaciju biznis plana,
- 6) ako u biznis planu nije predvidio korištenje poticajnih grant sredstava za neprihvatljive troškove iz Poglavlja IV ovog Javnog poziva,
- 7) ako do dana podnošenja prijave, po istom osnovu nije koristio poticajna grant sredstva iz drugih izvora,
- 8) ako je spreman registrovati pravno lice - društvo sa ograničenom odgovornošću, sa sjedištem na području KS u kojem ima većinski udio ukoliko bude odabran kao korisnik sredstava po ovom Javnom pozivu,
- 9) ako je spreman obezbijediti novčani ulog u osnovnom kapitalu pravnog lica iz tačke 8) ovog Poglavlja u iznosu minimalno 40% od ukupnog traženog iznosa poticajnih grant sredstava po ovom Javnom pozivu i ako je spreman minimalno iznos ovog novčanog uloga utrošiti za realizaciju biznis plana iz tačke 6) ovog Poglavlja,
- 10) ako njegova poslovna ideja (uobličena i razvijena u biznis planu) jeste aktivnost koja se može identificirati i registrovati kao osnovna djelatnost poslovnog subjekta prema klasifikaciji djelatnosti KD BiH 2010 ("Službeni glasnik BiH", broj 47/10) iz Tabele 1. ovog Poglavlja, **osim djelatnosti koje podliježu restrikciji u smislu člana 3. Zakona o stranim ulaganjima Federacije BiH ("Službene novine Federacije BiH". br. 61/01, 50/03 i 77/15),**
- 11) ako je dostavio prijavu u skladu sa ovim Javnim pozivom,
- 12) ako ispunjava sve ostale uslove iz ovog Javnog poziva i
- 13) ako je primjenom kriterija za odabir korisnika sredstava iz Poglavlja VIII ovog Javnog poziva i limita ukupno planiranih sredstava iz Poglavlja III ovog Javnog poziva odabran kao korisnik sredstava.

Tabela 1. Popis registrovanih osnovnih djelatnosti obuhvaćenih Javnim pozivom

Popis registrovanih osnovnih djelatnosti obuhvaćenih Javnim pozivom		
Područje prema KD BiH 2010	Naziv područja prema KD BiH 2010	Obuhvaćene šifre djelatnosti iz područja prema KD BiH 2010
C	Prerađivačka industrija	(10.11-10.92), 11.07, (13.10-18.20), (20.11-25.30) i (25.50-33.20)
D	Proizvodnja i snabdijevanje električnom energijom, plinom, parom i klimatizacija	35.11



E	Opskrba vodom; uklanjanje otpadnih voda, gospodarenje otpadom te sanacije okoliša	38.11, 38.12, 38.21, 38.22, 38.31 i 38.32
F	Građevinarstvo	(41.10-43.99)
G	Trgovina na veliko i na malo; Popravak motornih vozila i motocikala	(45.11-45.40), (46.21-46.24), (46.31-46.33), (46.36-46.39), (46.41-46.77), 46.90, (47.11-47.24), 47.29 i (47.41-47.79)
H	Prevoz i skladištenje	49.31, 49.39, 49.41, 49.42, 52.10, 52.21, 52.23, 52.24 i 52.29
I	Djelatnosti pružanja smještaja te pripreme i usluživanja hrane	(55.10-56.29)
J	Informacije i komunikacije	(58.11-63.99)
M	Stručne, znanstvene i tehničke djelatnosti	(69.10-75.00)
N	Administrativne i pomoćne uslužne djelatnosti	(79.11-79.90), (81.21-81.30), 82.11 i 82.20
P	Obrazovanje	85.10 i (85.51-85.60)
Q	Djelatnosti zdravstvene zaštite i socijalne skrbi	(86.21-88.99)
S	Ostale uslužne djelatnosti	(95.11-96.04)

III IZNOS SREDSTAVA

Ukupan planirani iznos sredstava (limit): Ukupan planirani iznos sredstava (limit) za poticaj prihvatljivih troškova po ovom Javnom pozivu je 350.000,00 KM (slovima: tristotinepedesethiljada konvertibilnih maraka), a ova finansijska sredstva utvrđena su u Budžetu Kantona Sarajevo za 2024. godinu, na poziciji "Poticaj razvoju male privrede", ekonomski kod 614500, subanalitika IAP 005 i planirana u Godišnjem planu provođenja Programa razvoja male privrede za 2024. godinu (u daljnjem tekstu: Godišnji plan).

Maksimalni iznos poticajnih sredstava po pojedinačnom korisniku: Maksimalni iznos poticajnih sredstava po pojedinačnom korisniku je 70.000,00 KM (slovima: sedamdesethiljada konvertibilnih maraka) za prihvatljive troškove iz Poglavlja IV ovog Javnog poziva.

IV PRIHVATLJIVI I NEPRIHVATLJIVI TROŠKOVI

Prihvatljivi troškovi koji su predmet poticaja po ovom Javnom pozivu su troškovi direktno i/ili indirektno neophodni za obavljanje osnovne djelatnosti novoosnovanog pravnog lica sa većinskim udjelom podnosioca prijave, a odnose se na:

- 1) kupovinu mašina, alata, opreme i tehnike, a koja nije starija od deset godina;



- 2) digitalizaciju poslovanja (što uključuje troškove izrade integralnog informacionog sistema, web hosting, business e-mail hosting, korporativne informativne web stranice, izradu webshop platformi, razvoj mobilnih aplikacija, i sl.) i
- 3) jačanje konkurentnosti kroz uvođenje sistema međunarodnih standarda kvalitete, odnosno angažman registrovanih institucija za pružanje odgovarajućih konsultantskih usluga i edukacije za certificiranje sistema i certificiranje proizvoda (CE oznaka) i sticanje prava ili obnavljanje upotrebe: ISO, HACCP, HALAL i drugih međunarodnih standarda.

Napomena 1: Za predmete nabavke iz tačaka 1), 2) i 3) ovog Poglavlja dobavljač mora biti poslovni subjekt koji je registrovan i obavlja odnosnu djelatnost u skladu sa zakonskim propisima.

Napomena 2: Poticajna sredstva može koristiti samo novoosnovano pravno lice sa sjedištem u Kantonu Sarajevo u kojem većinski udio ima podnosilac prijave koji bude odabran kao korisnik sredstava po ovom Javnom pozivu, i to samo za one prihvatljive troškove koji su nastali i plaćeni nakon registracije ovog novoosnovanog pravnog lica.

Neprihvatljivi troškovi: kupovina zemljišta, stana/kuće, vanjski građevinski radovi i nabavka i najam svake vrste motornog vozila, osim nabavke teretnog vozila i radne mašine registrovanih na novoosnovano pravno lice sa većinskim udjelom podnosioca prijave, vanjski građevinski radovi, troškovi električne energije, vode i drugi komunalni troškovi, troškovi repromaterijala, troškovi nabavke mobilnog telefona, te svi ostali troškovi koji nisu navedeni kao prihvatljivi.

V SADRŽAJ PRIJAVE NA JAVNI POZIV

Ovaj Javni poziv provodi se u dvije faze i to, kako slijedi:

V.1 I faza provođenja Javnog poziva

U I fazi provođenja ovog Javnog poziva podnosilac prijave - strano pravno lice, prilikom apliciranja na Javni poziv obavezan je dostaviti:

- 1) **Prijavni obrazac, u originalu**, uredno popunjen na jednom od jezika u službenoj upotrebi u BiH, ovjeren potpisom ovlaštenog lica podnosioca prijave i pečatom podnosioca prijave ako po zakonu države u kojoj je sjedište podnosioca prijave podnosilac prijave ima pečat, a ako po zakonu države u kojoj je sjedište podnosioca prijave podnosilac prijave nema obavezu da ima pečat dostavlja dokaz da nema tu obavezu.
- 2) **Isprave i dokumentaciju**, kako slijedi:
 - a) Aktuelni izvod iz registra društava za strano pravno lice - podnosioca prijave, ne stariji od 04.07.2024. godine i nadovjeren Apostille pečatom (original),
 - b) Prijevod izvoda iz podtačke a) ove tačke na jedan od jezika u službenoj upotrebi u BiH, ovjeren od strane ovlaštenog sudskog tumača za taj jezik i dodatno ovjeren Apostille pečatom, a ako službeni prijevod ovjerava ovlašteni sudski tumač na teritoriji BiH nije potrebna nadovjera Apostille pečatom (original),
 - c) Biznis plan, ovjeren od strane podnosioca prijave kako je to propisano u tački 1) ovog Poglavlja, sačinjen na jednom od jezika u službenoj upotrebi u BiH, koji je u skladu sa ekonomskim standardima i sa sadržajem iz Tabele 2. ovog Javnog poziva (original);
 - d) Prijevod finansijskog izvještaja podnosioca prijave za 2022. i 2023. godinu na jedan od jezika u službenoj upotrebi u BiH, ovjeren od strane ovlaštenog sudskog tumača za taj jezik (original);
 - e) Izjavu podnosioca prijave u originalu (Prilog 1. Javnog poziva), sačinjenu na jednom od jezika u službenoj upotrebi u BiH i ovjerenu od strane podnosioca prijave kako je to propisano u tački 1) ovog Poglavlja, kojom podnosilac prijave pod punom moralnom, materijalnom i krivičnom odgovornošću potvrđuje:
 - i. da nema registrovano poslovanje u Bosni i Hercegovini,
 - ii. da se protiv ovlaštenog lica podnosioca prijave ne vodi krivični postupak i da nije pravosnažno osuđen za počinjenje krivičnog djela i/ili privredni prijestup,



- iii. da posluje minimalno dvije godine do dana 31.12.2023. godine,
- iv. da nema duga po osnovu direktnih i indirektnih poreza,
- v. da nije predmet stečajnog ili likvidacionog postupka,
- vi. da u finansijskim izvještajima za 2022. i 2023. godinu ima prikazanu dobit,
- vii. da ispunjava uslove za svrstavanje u kategoriju subjekata male privrede prema definiciji subjekata male privrede iz Zakona o poticaju razvoja male privrede ("Službene novine Kantona Sarajevo", broj 29/15),
- viii. da do dana podnošenja prijave, po istom osnovu nije koristio poticajna grant sredstva iz drugih izvora,
- ix. da je spreman registrovati pravno lice sa sjedištem na području KS u kojem ima većinski udio ukoliko bude odabran kao korisnik sredstava po ovom Javnom pozivu,
- x. da je spreman obezbijediti novčani ulog u osnovnom kapitalu pravnog lica iz Poglavlja II tačke 8) ovog Javnog poziva u iznosu minimalno 40% od ukupnog traženog iznosa poticajnih grant sredstava po ovom Javnom pozivu i da je spreman minimalno iznos ovog novčanog uloga utrošiti za realizaciju biznis plana iz Poglavlja II tačke 6) ovog Javnog poziva,
- xi. da su podaci i dokumentacija koju je dostavio po ovom Javnom pozivu istiniti,
- xii. da je saglasan da rezultat ovog Javnog poziva bude objavljen na web stranici Ministarstva privrede Kantona Sarajevo i
- xiii. da je saglasan da Ministarstvo privrede Kantona Sarajevo i Komisija za izbor korisnika poticajnih sredstava po ovom Javnom pozivu mogu obrađivati dokumente kojima se dokazuje lični identitet lica u vezi sa predmetnom prijavom shodno odredbama Zakona o zaštiti ličnih podataka ("Službeni glasnik BiH", br. 49/06, 76/11 i 89/11).

Napomena 1: Podnosilac prijave, čije je sjedište na teritoriji jedne od država potpisnica Konvencije o ukidanju potrebe legalizacije stranih javnih isprava iz 1961. godine (u daljnjem tekstu: Haška konvencija), nadovjeru dokumenata iz tačke 2) podtačaka a) i b) ovog Poglavlja vrši sa Apostille pečatom, a podnosilac prijave čije je sjedište na teritoriji jedne od država koja nije potpisnica Haške konvencije vrši punu (redovnu) legalizaciju ovih dokumenata. Podnosilac prijave čije je sjedište na teritoriji jedne od država sa kojima BiH ima zaključen bilateralni sporazum o priznavanju javnih isprava bez legalizacije ne vrši dodatnu nadovjeru predmetnih dokumenata.

Napomena 2: Podnosilac prijave čije je sjedište na teritoriji jedne od država u kojoj je službeni jezik u upotrebi jedan od službenih jezika u BiH, ne mora vršiti službeni prijevod dokumenata iz tačke 2) podtačaka a), b) i d) ovog Poglavlja, već dostavlja original ili ovjerenu fotokopiju ovih dokumenata.

Tabela 2. Minimalni sadržaj biznis plana

Minimalni sadržaj biznis plana	
Redni broj	Obavezno poglavlje
1	Podaci o osnivaču
2	Kratak opis poslovne ideje
3	Opis proizvoda/usluge
4	Poređenje proizvoda/usluge sa proizvođačom/uslugom konkurencije
5	Cijena proizvoda/usluge
6	Ciljano tržište
7	Konkurencija



8	Kratak plan marketinga i prodaje
9	Naziv, lokacija, planirani oblik organizacije (d.o.o.)
10	Podaci o ulozi osnivača u poslovnom subjektu
11	Ljudski resursi
12	Podaci o menadžmentu
13	Proizvodni proces
14	Podaci o dobavljačima i potrebnim uslugama
15	Rizici i načini smanjenja rizika
16	SWOT analiza (analiza snaga, slabosti, prilika i prijetnji)
17	Plan početnih ulaganja (sopstveno učešće, potreban iznos poticajnih sredstava koja se traže od Ministarstva privrede Kantona Sarajevo po ovom Javnom pozivu, ukupan iznos sredstava početnih ulaganja – budžet projekta)
18	Narativni opis plana finansiranja poslovnog subjekta (podrazumijeva opis aktivnosti koje se finansiraju sopstvenim učešćem i opis aktivnosti koje će se finansirati iz traženog iznosa poticajnih sredstava)
19	Finansijske projekcije za prve tri godine poslovanja (broj zaposlenih, bruto prihodi, bruto rashodi, fiksni troškovi, varijabilni troškovi, poslovni prihodi i poslovni rashodi, poslovni dobitak/gubitak, neto dobit, učešće proizvođača/usluge u bruto prihodima za godinu)

V.2 II faza provođenja Javnog poziva

U II fazi provođenja ovog Javnog poziva, novoosnovano pravno lice sa većinskim udjelom podnosioca prijave odabranog odlukom Vlade Kantona Sarajevo (u daljnjem tekstu: novoosnovano pravno lice), prije zaključivanja ugovora o dodjeli poticajnih sredstava obavezno je dostaviti:

1) Isprave i drugu dokumentaciju novoosnovanog pravnog lica, kako slijedi:

- Aktuelni izvod iz sudskog registra za subjekt upisa, izdat od Općinskog suda u Sarajevu u kojem je evidentiran većinski udio u kapitalu odabranog podnosioca prijave i minimalni novčani iznos ovog udjela od 40% traženih poticajnih grant sredstava po ovom Javnom pozivu (original ili fotokopija ovjerena od nadležnog organa - općina/notar);
- Potvrda banke o realizovanom nalogu u kojoj je evidentirana uplata minimalnog iznosa iz podtačke a) ove tačke (original);
- Uvjerenje o poreskoj registraciji - identifikacijski broj (ID broj) izdato od Porezne uprave Federacije BiH (original ili fotokopija ovjerena od nadležnog organa - općina/notar);
- Obavještenje o razvrstavanju novoosnovanog pravnog lica prema klasifikaciji osnovne djelatnosti, koje izdaje Federalni zavod za statistiku - Služba za statistiku za područje Kantona Sarajevo prema Klasifikaciji djelatnosti KD BiH 2010 ("Službeni glasnik BiH", broj 47/10) (original ili fotokopija ovjerena od nadležnog organa - općina/notar);
- Lista osiguranika za obveznika – novoosnovano pravno lice, izdata od strane Porezne uprave Federacije BiH ne starija od 30 dana od dana dostavljanja, na kojoj mora biti evidentirano minimalno dva uposlenika (original ili fotokopija ovjerena od nadležnog organa - općina/notar);



- f) Ugovor ili potvrda banke o otvorenom glavnom bankovnom računu na ime novoosnovanog pravnog lica (original ili fotokopija ovjerena od nadležnog organa - općina/notar);
- g) Izjavu ovlaštenog lica novoosnovanog pravnog lica, u originalu (Prilog 2. Javnog poziva), sačinjenu na jednom od jezika u službenoj upotrebi u BiH, ovjerenu potpisom ovlaštenog lica, te dodatno ovjerenu od nadležnog organa - općina/notar, kojom ovlašteno lice pod punom moralnom, materijalnom i krivičnom odgovornošću potvrđuje:
- i. da se protiv njega ne vodi krivični postupak i da nije pravosnažno osuđen za počinjenje krivičnog djela i/ili privredni prijestup,
 - ii. da će novoosnovano pravno lice u kojem je ovlašteno lice namjenski utrošiti sredstva koja mu budu dodijeljena po ovom Javnom pozivu,
 - iii. da podnosilac prijave po ovom Javnom pozivu i novoosnovano pravno lice u kojem je ovlašteno lice za predmet poticaja za koji je podnesena prijava po ovom Javnom pozivu nije primio poticajna grant sredstva putem drugih programa finansiranja/sufinansiranja,
 - iv. da će novoosnovani poslovni subjekt sufinansirati realizaciju biznis plana dostavljenog po ovom Javnom pozivu u minimalnom iznosu od 40% traženih poticajnih grant sredstava po ovom Javnom pozivu,
 - v. da su podaci i dokumentacija koju je novoosnovano pravno lice dostavilo po ovom Javnom pozivu istiniti,
 - vi. da je saglasan da Ministarstvo privrede Kantona Sarajevo može obrađivati dokumente kojima se dokazuje njegov lični identitet i lični identitet drugih lica u vezi sa predmetnom prijavom shodno odredbama Zakona o zaštiti ličnih podataka ("Službeni glasnik BiH", br. 49/06, 76/11 i 89/11);
- h) dvije bjanko ovjerene mjenice (originali);
- i) dvije mjenične izjave popunjene u štampanoj formi, za svaku od mjenica iz podtačke h) ove tačke (Prilog 3. Javnog poziva) (originali).

Posebne napomene:

- Podnosilac prijave odabran odlukom Vlade Kantona Sarajevo prije zaključenja ugovora o dodjeli poticajnih sredstava ima obavezu da registruje novoosnovano pravno lice, odnosno društvo sa ograničenom odgovornošću u kojem ima većinski udio i da dostavi cjelokupnu dokumentaciju iz Poglavlja V.2 ovog Javnog poziva Ministarstvu privrede Kantona Sarajevo. Ugovorom o dodjeli poticajnih sredstava definisat će se svi detalji i pravila korištenja predmetnih poticajnih sredstava (prava i obaveze ugovornih strana).
- Korisnik sredstava – novoosnovano pravno lice ima obavezu da posluje minimalno dvije godine, počev od dana njegove registracije, a u tom periodu mu nije dozvoljeno otuđenje i prodaja osnovnih sredstava finansiranih poticajnim sredstvima dodijeljenim po ovom Javnom pozivu.
- Krajnji rok za zaključivanje ugovora sa novoosnovanim pravnim licem (korisnikom sredstava), koji Ministarstvu privrede Kantona Sarajevo dostavi dokumentaciju iz Poglavlja V.2 ovog Javnog poziva do dana 20.12.2024. godine je 31.12.2024. godine.
- Shodno članu 8. stav (3) Pravilnika o postupcima u provođenju programa razvoja male privrede ("Službene novine Kantona Sarajevo", br. 20/21, 25/23, 47/23 i 16/24), dokumentacija dostavljena po Javnom pozivu ne vraća se podnosiocu prijave.
- Ukoliko se naknadno utvrdi da su tvrdnje u izjavi iz Poglavlja V.1 tačka e) i Poglavlja V.2 tačka g) neistinite, kao i da je druga dokumentacija podnosioca prijave i novoosnovanog pravnog lica propisana ovim Javnim pozivom neistinita, prijava se neće uzeti u razmatranje, a ukoliko se ove činjenice utvrde nakon dodjele poticajnih sredstava, novoosnovano pravno

lice kojem budu dodijeljena sredstva dužno je izvršiti povrat ovih sredstava sa pripadajućim zakonskim zateznim kamatama.

VI ROK ZA PODNOŠENJE PRIJAVA

Rok za dostavljanje prijave je 30 (trideset) dana od dana objave Obavještenja o Javnom pozivu u "Službenim novinama Kantona Sarajevo", odnosno od 04.07.2024. godine. Javni poziv, prijavni obrazac, i pripadajući prilozi objavljeni su na web stranici Ministarstva privrede Kantona Sarajevo: <http://mp.ks.gov.ba/>.

VII MJESTO I NAČIN PODNOŠENJA PRIJAVA

Prijava se podnosi u zatvorenoj koverti direktno na protokol Kantona Sarajevo ili preporučeno putem pošte na adresu: Ministarstvo privrede Kantona Sarajevo, ulica Reisa Džemaludina Čauševića broj 1, sa naznakom "Ne otvarati - po Javnom pozivu za dostavljanje prijave po programu: Poticaj direktnih stranih ulaganja - Podrška za osnivanje pravnog lica čiji je osnivač strani ulagač" što mora biti navedeno na prednjoj strani koverta. Na poledini koverta obavezno je navesti sljedeće: puni naziv podnosioca prijave, adresa sjedišta, e-mail adresa i kontakt telefon, te ovjeriti pečatom.

VIII KRITERIJI ZA IZBOR KORISNIKA

1) Na podnosioca prijave koji u I fazi zadovolji sve uslove ovog Javnog poziva bit će primijenjeni kriteriji za rangiranje - ocjena kvaliteta i tržišnog potencijala dostavljenog biznis plana iz Tabele 3. ovog Javnog poziva. Maksimalan broj bodova za ocjenu kvaliteta i tržišnog potencijala biznis plana je 70 bodova. Podnosilac prijave koji ostvari manje od 35 bodova prilikom evaluacije biznis plana ne može ući u dalju proceduru dodjele sredstava po ovom Javnom pozivu.

Tabela 3. Kriteriji za ocjenu kvaliteta i tržišnog potencijala biznis plana podnosioca prijave

I Kriteriji za ocjenjivanje kvaliteta biznis plana	
Naziv kriterija	Broj bodova
Istraživanje tržišta	0-7
Marketing plan	0-5
Plan pružanja usluga/proizvodnje	0-11
Plan organizacije i menadžmenta	0-5
Finansijski plan	0-7
II Kriteriji za ocjenjivanje doprinosa biznis plana lokalnoj ekonomiji	
Naziv kriterija	Broj bodova
Inovativnost	0-7
Ocjena održivosti	0-19
Mogućnost kreiranja novih radnih mjesta	2 radna mjesta - 1 bod
	3 i više radnih mjesta - 3 boda
Mogućnost izvoza	0-2
Mogućnost upošljavanja lokalnih dobavljača	0-4
Maksimalan broj bodova	70 bodova

2) Prijava će se bodovati i po kriteriju ukupnog iznosa sufinansiranja realizacije biznis plana, a najveća vrijednost po ovom kriteriju iskazana u konvertibilnim markama bit će ocijenjena sa 30 bodova.



- 3) Za podnosioca prijave koji ponudi vrijednost sufinansiranja manju od najveće vrijednosti iz tačke 2) ovog Poglavlja, bodovanje će se vršiti na sljedeći način: (Ukupna vrijednost iznosa sufinansiranja biznis plana / Najveća vrijednost iznosa sufinansiranja biznis plana) x 30 bodova.
- 4) Na osnovu kriterija iz tačaka 1) i 2) ovog Poglavlja podnosilac prijave može ostvariti maksimalno 100 bodova.
- 5) Po ovom Javnom pozivu može biti odabran broj korisnika do iskorištenja limita iz Poglavlja III ovog Javnog poziva.

IX OSTALE ODREDBE

Sa odabranim korisnicima Ministarstvo privrede Kantona Sarajevo zaključuje ugovor o dodjeli poticajnih sredstava, nakon čega se sredstva doznačavaju na dostavljene račune korisnika. U skladu sa ugovorom korisnik poticajnih sredstava ima obavezu da po izvršenoj dodjeli sredstava u roku od šest mjeseci dostavi dokaze o utrošenim sredstvima za koje su odobrena sredstva po prihvaćenom biznis planu, odnosno ugovore i/ili račune uz fiskalni račun (ukoliko postoji zakonska obaveza izdavanja fiskalnog računa) kojima se dokazuje namjensko korištenje sredstava i dokaze o plaćanju dostavljenih računa (izvod iz banke ili potvrda banke o realizovanom nalogu za plaćanje), te fotodokumentaciju mašina, postrojenja i opreme koja je nabavljena. Ministarstvo privrede Kantona Sarajevo se obavezuje da vrši nadzor nad provođenjem ugovornih obaveza iz ugovora o dodjeli poticajnih sredstava, uvidom u dokumentaciju u vlastitim prostorijama i kod korisnika sredstava, a u slučaju potrebe i uvidom u podatke pribavljene službenim putem od strane relevantnog nadležnog organa. Ministarstvo privrede Kantona Sarajevo pri vršenju nadzora poduzima mjere iz svoje nadležnosti, a u slučaju kada činjenično utvrdi razlog za poduzimanje odnosne mjere ili utvrdi postojanje osnovane sumnje da postoji krivična odgovornost određenog lica, u njegovom postupanju prije i nakon zaključenja ugovora, Ministarstvo privrede Kantona Sarajevo će bez odgađanja pokrenuti postupak utvrđivanja krivične odgovornosti tog lica. Podnosilac prijave po ovom Javnom pozivu, u cilju zaštite svojih prava, može dostaviti pisani prigovor Ministarstvu privrede Kantona Sarajevo, u roku od osam dana od dana objave preliminarnog prijedloga korisnika poticajnih sredstava. Po ovom prigovoru riješava Ministarstvo privrede Kantona Sarajevo, najkasnije u roku od 15 dana. Ovaj Javni poziv objavljen je na bosanskom jeziku, a objavljeni su i službeni prijevod ovog Javnog poziva na engleskom i njemačkom jeziku. U slučaju eventualnog odstupanja između Javnog poziva objavljenog na bosanskom jeziku i službenih prijevoda ovog Javnog poziva na engleskom i njemačkom jeziku, primjenjivat će se Javni poziv na bosanskom jeziku.

Napomena: Zahtjev za dodatne informacije po određenim pitanjima iz ovog Javnog poziva se može podnijeti putem telefona: **033/258-132**, svakim radnom danom u periodu od 08:00 do 12:00 sati i u periodu od 14:00 do 16:00 sati.



Dostaviti:

1. Za prijevod kod ovlaštenog sudskog tumača (x2).
2. Evidencija i
3. a/a.

